



Jens Napâtôk'
Inatsisartunut Ilaasortaq
Naleraq

Taxanik ingerlatsineq pillugu § 37 naapertorlugu apeqquteqaammut 2024-062- imut akissut

17-05-2024
Sags nr.: 2024 - 7848
ID nr.: 92249596

Asasara Jens NapâtôK

Inatsisartut suleriaasianni § 37 naapertorlugu taxanik ingerlatsineq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1. Taxa-nik ingerlatsineq pillugu Kalaallit Nunaanni malittarisassat suut atuuppaat?

Akissut: Kalaallit Nunaanni aqqusinertigut angallannermut inatsit pillugu nalunaarummi nr. 995, 26. oktober 2009-meersumi § 69, Transportministeri taxanut, bussinullu malittarisassanik aalajangersaasinnaanissaanut inatsisitigut tunngavissartaqarpoq. Justitsministeri suliaqarfimmum aalajangersaasinnaanerani inatsisitigut tunngavissiilluni Kalaallit Nunaanni aqqusinertigut angallannermut inatsimmit 1976-imeersumit, aalajangersagaq taanna ingerlateqqitaavoq. 1976-imi inatsimmi inatsisitigut tunngaviusoq, kommuninik aaqquissuuseqqinnissaq sioqqullugu kommuninut ataasiakkaanut tunngatillugu, biilinut inunnik angallassissutinut polititit nalunaarutaanni atuuttussanngortinneqarpoq. Færdselestyrelsen paasissutissiissutigaa taakkua polititit nalunaarutaat atuukkunnaareersut, kommuninut piujunnaareersunut aalajangersagaammata.

Taassumap saniatigut Nakkutilliinermut atortunut il.il. piunasaqaatit pillugit Namminersornerullutik Oqartussat nalunaarutaat, biilit inunnik angallassissutit eqqarsaatigalugit eqqussuinermi akitsuutinik malittarisassiuussisuusq, taxartitsisunut atuuppoq.

Apeqqut 2. Sooruna kommunit taxa-nut akuersissutinik suliaqarsinnaajunnaarsimasut?

Akissut: Kommunit sulianik suliaqarnissaminnut tunngavissaqartillutik taamaallaat sulianik suliaqarsinnaapput. Taxanut tunngatillugu inatsisitigut tunngavissaqanngimmat, siusinnerusukkut suleriaasiusoq tunngavigalugu piffissami sivisuumi kommunit sulianik suliaqartarsimapput. Kommunit Naalakkersuisullu ersarissumik kissaatigaat, suleriaaseq aamma inatsisitigut aalajangersarneqassasoq.

Apeqqut 3. Taxa-tillip nammineerluni taxameterinut tunngasut allanngutsaalisat nakkutilliinermullu tunngasut ilanngullugit allanngortissinnaangai tunngavissaqarpa?

Akissut: Aningaasaqarnermut Akileraartarnermullu Naalackersuisoqarfiup paasissutissiissutigaa:

“Biilit inunnik angallassissutit maanga nunamut eqqunneqartillugit, eqqussinermi akitsuutip 50 %-ianik kinguartitsigallarnissaminik piginnittoq kissaateqartillugu, akitsuutit pillugit inatsit atuuttoq biilini inunnik angallassissutinik piginnittumut piumasaqaatitaqarpoq. Eqqussuinermit akitsuutit pillugit Inatsisartut inatsisaanni § 1-imi, imm. 1-imi, nr. 26-mi, naqinneq a naapertorlugu piumasaqaataavoq, ”inunnik angallassissutit pineqartut nakkutilliinermit atortuligaasimanissaat, inunnik angallassissutit ingerlaarnerminni ilaasoqarsimanerat tassuunakkut nalunaarsorneqarsinnaassalluni, aammalu taanna taxameterimi kilometerinik ilaasoqarfiusimasunik kisitsissummut naapertuuttumik atuutissasoq”.

Malittarisassat Nakkutilliinermit atortunut il.il. piumasaqaatit pillugit Namminersornerullutik Oqartussat nalunaarutaat nr. 27, 22. december 2000-imeersumi, ilanngussanilu atasuni atuuttussanngortinneqarput. Tassani ilaatigut allassimavoq, nakkutilliinermit atortut biilini inunnik angallassissutinut atasut aqerlorterneqarsimassasut, nakkutilliinermilu atortut siunertaannut akornutaasinnaasumik iliuseqartoqaqqusaanngitsoq.

Biilini, matumani taxameterini aamma nakkutilliinermit atortut ilanngullugit, aqerlortiternernik taxartitsisoq nammineerluni peersinnaammat miserratigineqarsinnaanngilaq.

Taamatut iliuutsit inatsimmik atuuttumik unioqutitsinerupput. Taamaattoqassappat, suleriaaseq malillugu akitsuut tamakkiisumik akilerneqassaaq. Taamatut pisoqarnera nakkutilliinermit atortumik peersinermit imaluunniit iluarsartuussinnginnermit nallersuunneqartariaqarpoq, soorlu tamanna inatsisip § 1-iani, imm. 1-imi, nr. 26-mi, naqinneq f-imi allassimasoq.”

Apeqqut 4. Politiit taxanut tunngasunik misissuimajunnaarsimanerannut suliaqarumajunnaarsimanerannullu suna pissutaava?

Akissut: Akissuteqarnissami Justitsministeria tapersiissuteqaqquneqarami ima paasissutissiivoq:

”Apeqqutip akinissaanut Justitsministeria Naalagaaffiup politiivi oqaaseqartippai, imalu paasissutissiippat:

”Naalagaaffiup politiivi akissuteqarnissaminni Kalaallit Nunaanni Politiit tapersiissuteqartippai.

Kalaallit Nunaanni Politiit aallarniutigalugu paasissutissiissutigaat, pisortat suliaassaannik inatsimmik unioqutitsisoqarsimaneranik pasitsaassisoqartillugu politiit paasiniaallutik aallartittartut, tak. Kalaallit Nunaanni eqqartuussisarnermut inatsisip § 338-ani imm. 1.

Kalaallit Nunaanni Politiit nalilerpaat, unioqqutitsilluni biilini angallassinernut inerteqquteqarnissamut massakkut inatsisiusumi aalajangersagaqanngitsoq. Tamanna tunuliaqutaralugu, unioqqutitsilluni biilini angallassineq pillugu nalunaaruteqartoqartillugu, Kalaallit Nunaanni Politiit paasiniaanissaminnut tunngavissaqanngillat.

Taassumap saniatigut politiit paasissutissiissutigaa, angallannermut inatsit naapertorlugu politiit nakkutilliinissamik siunertaqartumik biilini unitsitsuaannarsinnaasut. Tassunga atatillugu unioqqutitsilluni biilini angallassisoqartoq politiit paasigunikku, assersuutigalugu isertitat akileraarusigassat nalunaarutigineqanngissinnaammata, tamanna pillugu politiit akileraartarnermut oqartussaasut ilisimatissavaat.

Apeqqutip akineranut atatillugu Færdselsstyrelsen nalunaarutigaa, taxanut inatsit malillugu biilini ingerlatitsisut Danmarkimi inuussutissarsiuutigalugu inunnik angallassisinnaanerminnut ingerlatsisinnaanermut allagartaqassasut, taxanulli inatsit Kalaallit Nunaannut atuutinngitsoq. Taamaattumik ingerlatsisinnaanermut allagartaqarnissaq Kalaallit Nunaanni piumasagaataanngilaq, taamaalillunilu Kalaallit Nunaanni inuussutissarsiuutigalugu inunnik angallassinermi ingerlatsisinnaanermut allagartaqannginnermut atatillugu, pineqaatissiisinnaanermut aalajangersagaqarani. Taamaattumik politiit nalilerpaat, malittarisassanut atatillugu akuliunnissaq politiit suliaasaanngitsoq.””

Apeqqut 4.a. Naalackersuisut siuliani eqqartorneqartut akuerisinnaavaat?


Akissut: Naalackersuisut naatsorsuutigaa, inatsisip atuuttup malinneqarnissaa Kalaallit Nunaanni Politiit qulakkeertaraat.

Apeqqut 4. Taakku pillugit Naalackersuisut qanoq iliuseqarnialersaarpat?

Akissut: Transportministeri Thomas Danielsen qinnuigaara, suliaasaqarfimmi inatsiseqaleqqinniassammat sionatigut politiit nalunaarutigisimasaat aallaavigalugit piaartumik nutaamik malittarisassiortoqassasoq. Taassumap kingorna malittarisassat Kalaallit Nunaanni pissutsinut, ullutsinnilu pissutsinut naleqqussarneqassanersut misissorumaarparput.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Hans Peter Poulsen